

Maart 12, 2019

www.awemainta.com

www.facebook.com/awemainta

noticia@awemainta.com

583-1400



AWEMainta

15
año

Pa por bishita New York un biaha mas

Minister Xiomara Ruiz Maduro a crea posibilidad di por acompañá Evelyn Wever Croes

SUMAMENTE sorprendi nos a keda di mira con Minister di Finanza, Xiomara Ruiz Maduro ta pone riba su facebook, alegando cu: “E siman aki nos (?) ta na New York pa bishita e companianan di rating Fitch y Standard & Poor’s p’e evaluacion di e credibilidad financiero di nos pais”.

Pa cuminsa e mandatario no ta splica kende ta (nos), pasobra normalmente e institucionan financiero aki ta bin Aruba pa haci nan trabao, unda nan lo kier papia cu e.o. Banco Central y cu otro departamentonan gubernamental.

No tabata necesario pa bay New York pa duna cuenta na e.o. Fitch y Standard & Poor’s. No por kita nos impresion cu Minister Xiomara Ruiz Maduro ta actua como “chaperon” di Evelyn Wever Croes, kende ayera tabata na Nacionnan Uni pa duna un discurso encuanto hende muher na poder.

No ta prome biaha cu esaki ta tuma lugar, pero awor a bisa cu ta basta. Pesey bin di biaha den nos mente, un dicho di difunto Guillermo Trinidad, kende a yega di bisa: “Join the MEP and see the World” y awe mas y mas Guillermo Trinidad mas cu e no ta cu nos mas, ta hayando razon.



Nan a demostra malcontento blokiando caminda

Chauffeurnan di truck mester forma comision pa sigui reuni cu Minister



E operadornan di compania di coba santo, kendenan ta rabia cu e maneho di Gabinete Wever Croes, a dicidi di uni forsa pa dialuna mainta blokia caminda dilanti di Bestuurskantoor. Manera ta conoci, Gobierno a dicidi di cera e areanan cu actualmente ta wordo uza pa coba graniet.

Nan a sinta cu e mandatario encarga Otmar Oduber, pero no a keda satisfecho pa cual a dicidi di muestra nan malcontento di e forma aki.

Un di e preocupacionnan cu e personanan aki tin, y cu nan no a keda convenci cu e splicacion ricibi, ta e supuesto “aanleg vergunning” cu chauffeurnan di truck lo mester pidi. E grupo cu a reuni cu e mandatario a wordo splica cu esaki no ta e caso.

Despues di e reunion e companianan ainda tabatin e caminda blokia pa scucha kico tur a sali for di esaki.

E team di negociado a haya splicacion riba y prome cos cu a bisa nan ta cu e chauffeurnan di truck no mester worry, pasobra nan no mester pidi ‘aanleg vergunning’ mas, of por lo menos pa awor.

Mester bini un sistema unda cu ta miho splica kico e “aanleg vergunning” ta, kendenan mester busk’e. Pa awor e chauffeurnan por sigui funciona normal. Den e ROP nobo a cera tur e areanan aki cu ta cay den e parti protegi.

Inicialmente a wordo bisa cu e chauffeurnan di truck, cu hopi biaha ta un compania riba nan mes, lo mester busca un permiso pa saca santo. Pero awor ta wordo splica cu esaki no ta e caso.

Pues e companianan cu actualmente ta coba e santo, ta esun cu lo mester pidi e “aanleg vergunning” pa busca e santo na Aruba of for di exterior pa bende cu e chauffeurnan di truck cu ta entrega esaki na nan clientenan.

Gobierno tin e idea pa cera tur mina na Aruba, pero e companianan ta di opinion cu esey no mester. A bin cu un acuerdo unda lo lanta, otro siman, un comision special cu representante di e operadornan di companianan (cu ta coba santo) pa papia cu gobierno. Lo purba convence gobierno cu no mester cera tur mina, segun Patrick Boset di Cala Romana.

Algun mina ta cera, pero tambe tin cu ta habri y otronan cu lo bay habri bek, a wordo splica. E companianan lo por sigui eherce nan trabou y no mester di un permiso.

Pa loke ta rosamento di tereno p’e trabou por sigui si mester di un ‘aanleg vergunning’ y por haya esaki na DIP, y esaki lo por keda cla den maximalmente 30 dia. Den e parti di tiramento di sushi tin un situacion di cual algun hende a bisa cu Serlimar ta uzando prijsnan cu no ta exactamente husto, manera cu e negoshinan aki ta haya. A papia di esaki tambe cu e mandatario y el a keda di bay averigua. Si esaki ta e caso, e prijs lo wordo adapta. Pues e mesun prijs cu Serlimar ta paga pa tira sushi, e chauffeurnan di truck lo mester haya tambe.

Tin diferente punto cu a keda pendiente cu lo mester wordo atendi door di e comision cu mester wordo lanta pa otro siman. Tin hopi punto di preocupacion cu e chauffeurnan di truck y esnan cu ta coba tin ta relaciona cu aspectonan cu tin di haber cu ley y a ser hinca den e ROP. Tur e puntonan aki mester bay wordo studia hunto cu nan Abogado pa discuti riba nan durante e siguiente reunion.

Tin hopi provision den e ROP cu e mes como doño di compania no tabata na altura di dje. Asina por ehempel e ROP ta bisa cu esnan cu tin tereno den naturalesa por haya un otro tereno, of por pidi daño y perhuicio. P’esey e ta haya cu ta bon pa tur hende studia e ROP bon, hunto cu nan conseheronan, pa ta bon prepara ora cu e siguiente reunion tuma luga. Tin informacion, segun Boset, cu nan niun tabata na altura di dje prome cu e reunon cu e mandatario. Sinembargo tin puntonan cu nan mester sigui lucha p’e, pasobra esey ta nan pan, nan entrada pa cria nan famia. “Ainda tin e derecho pa sigui cu e lucha, unicamente mester sa kico nan ta representa kico mag di haci pa por duna pan nan famia.

<Continuacion na pagina 3>

Defensa di Paul Croes lo pidi pa scucha serie di testigo

Ex Minister di Asuntonan Social y Labor, Drs. Paul Croes den un declaracion duna na e portal di noticia 24.ora a informa cu e lo pidi Hof pa scucha un serie di testigo den e caso di dje (IBIS) cu el a apela.

E anuncio aki a bini na mesun momento cu Ministerio Publico a anuncia tambe cu nan a apela no tur, manera a ser informa anteriormente, pero algundi e sentencianan cu a cay dia 22 di februari ultimo. Nan a menciona esun di ex Minister Paul Croes y 4 otro caso mas, pero no a menciona e nombrenan. AWEMainta por a compronde cu un di e decisionna cu nan a apela tabata contra di Ninosca Nuñez.

Di otro banda, un di e clientenan di Abogado mr. Chris Lejuez, kende a haya un castigo den forma di boet a apela su decision. Esey ta simplemente pa principio ya cu e comerciante ta sinti cu e no a paga pa soborno ni ricibi sobonor y ni un multa e lo acepta.

Croes for di prome instancia a bisa cu e lo apela e decision y lo bringa e caso te na final pa demostra dilanti tres Hues su inocencia, algo cu e ta bringa y lucha p'e. A repasa henter e vonnis cu defensa y a yega na e conclusion cu e tabata un sentencia inexplicabel. Ta parce cu e Hues no a compronde e defensa cu a wordo treci dilanti y ta spera cu dilanti tres Hues lo por tin mas chens pa duna un miho splicacion.

Ey e lo kier pa e tres Huesnan haya un miho bista di con e sistema politico ta funciona na Aruba y cu donacion na partido, na politiconan individual of na fundacionnan politico ta normal den comunidad di Aruba. Awor aki Hues a condena comerciantenan cu a yuda cu un weya di sopi, un caha di cerbes of hasta cu cuminda. "Mi no a haci nada otro cu loke otro politiconan a haci durante e ultimo 30 pa 40 añanan di politica na Aruba. Haci peticion pa donacion politico y evento ta algo di nos cultura politico," Croes a enfatisa un biaha mas. Hopi politico ainda ta haci esaki segun e sistema tradicional cu ta tuma placa cash, pero el a dicidi di haci esaki via di un fundacion.

Aworaki ta evaluando con pa hiba e defensa den Hoger Beroep, y aunke no kier pa OM haya sa nan strategia, e por a duna un adelanto di loke lo bay haci. E por a bisa cu nan ta bay haci un peticion pa algun politico wordo scucha door di Hues Comisario of Hues. "Ami no por bay carga e consecucionnan di un sistema cu a bin ta t'asina ultimo decadanan. Ta interesante pa puntra nan con nan tabata haci recaudacion di fondo. Y cu e comerciantenan aki hamas lo a haya algo bek di Gobierno," el a bisa.

OM no kier a comenta ainda riba e peticion cu defensa lo bay haci, te ora cu Hof tuma un decision riba esaki. No ta conoci ainda, ki dia e fecha di tratamiento lo ta.

Autonan ta sigui bolter den e mesun bocht na Franse Pas

Ta spirito ta hacienda esaki?



DIALUNA mainta Polis a bay pura un biaha mas p'e lorada den Franse Pas, unda un otro auto a bolter. Ta manera ta spirito ta hacienda esaki. Na yegada y na mesun sitio cu tur ta bolter a topa un Hyundai Tucson. Esaki tabata riba su banda drechi benta. E Tucson tabata biniendo di Franse Pas, cu un dama na stuur. Caminda tabata muha y cu e velocidad poco halto a causa cu el a perde control y bay cay pariba di caminda. Ambulance a ser pidi p'e chauffeur, y na yegada a opta pa bay cu e dama Hospital pa mas control.

AVP ta yama reunion pa convoca un manifestacion nacional !



PA awe nochi Partido AVP ta invitando su dirigentenan di barrio y activistanan pa delibera riba e convocacion di un Manifestacion Nacional contra gobierno y pa para e desaroyo doloroso cu e ta creando na Aruba.

Pueblo ya mas no por soporta e medidanan di e gobierno y awor tin un otro cantidad di medida den preparacion cu practicamente ta un otro redoblacion di BBO. Pues un redoblacion riba redoblacion mientras cu CAFT ta muestra cu gastonan di gobierno a subi cu mas di 100 miyon florin.

Pueblo ta pagando pa un grupito di privilegiadonan di gobernacion Evelyne Wever Croes cu ta abusando di poder. E momento a yega pa para e desaroyo aki.

Diamars 12 di Maart cuminsando for di 7'or di anochi na Cas di Partido.

AVP como e partido mas grandi di Aruba ta yama na momento husto aki di pena den Pueblo pa sali uni cu Pueblo pa para e desaroyo aki. Fecha di e Manifestacion Nacional aki cu pueblo ta sclamando pe basta tempo caba ta bai worde determina den dialogo cu activistanan y dirigentenan di bario Diamars awor !

<Continuacion di pagina 2>



No lo rindi y si algo no ta husto, esey lo lucha pa nan. Esey ta loke tur hunto mester para tras di dje, pasobra cada uno tin un causa diferente pero na final e ta pa tur hende tambe.” Segun Wedras De Souza di Leblon N.V. na momento di a sinta cu minister a pasa riba varios punto di e manifesto. E cabesnan di comisionnan lo sinti hunto pa atende e puntonan. Den e puntonan menciona na minister ta habrimiento di cunucu, producto di Aruba cu mester uza nan.

Ya sa caba cu den nan parti tin e pensamiento di trece producto di afo cu no por perhudica esunnan cu ta cumpra y vende. A splica gobierno cu si bay trece producto di afo, tin compania grandi so lo privilegia di esaki y esey ta esun cu tin e monopolio. E companianan chikito no tin esaki, el a expresa. E compania grandi cu ta importa ta competi cu e companianan chikito, pasobra nan tin truck chikito.



Pa loke ta e parti di tiramento di sushi, Serlimar ta sali y haci un competencia cu no ta fair ariba caya. Esaki ta pa motibo cu Serlimar tin un prijs mas abou cu nan. Segun minister, e no ta kere cu Serlimar no a ricibi hopi tereno pa rosa, pero e companianan cu ta rosa tereno no ta di acuerdo cu loke e minister a bisa.

Den e reunion cu minister lo trece e punto aki dilanti. Minister ta dispuesto pa sinta y combersa pa no trece competencia inhusto. Un ehempel cu Wedras De Souza a duna ta si ta cobra 350 pa truck pero e compania mester paga pa ton pa tira sushi mientras Serlimar ta por nada. Esaki ta loke kier cambio den dje.

Awo e grupo lo mester bay scoge nan representantenan pa forma parti di e comision cu lo cuminsa cu nan reunion otro siman.

Despues di un aña y mei den Gobierno

Te ainda no tin un maneho drechi pa loke ta parkeer den Centro di Oranjestad

Awor atrobe lo anuncia un maneho nobo



DESPUES di tende Minister Chris Romero, por conclui cu no tin un maneho coherente pa loke ta parkeer den Centro di Oranjestad. Ta un secreto publico, y sigur den campaña cu Evelyn Wever-Croes den su calidad di lider di MEP, pero tambe su tras, Glenbert Croes a ripiti loke lo ta nan maneho, unaves cu MEP ta den Gobierno.

“Nos lo elimina parkeermeter, pasobra esaki a caba cu negoshi den Centro di Oranjestad. Y te awe no a mira un mehoracion, maske cu mesun Gobierno aki despues a institui hasta un comision cu mester a traha pa wak con por atrae mas hende den Centro di Oranjestad, Esaki a tuma lugar unicamente den fin di aña y despues e comision aki a bay “drumi” sin ainda por lanta for di soño.

Minister Chris Romero a keda di bin cu un maneho nobo pa loke ta parkeo den Centro di Oranjestad, pero te dia di awe net nada.

Awor ainda siman pasa, a bolbe anuncia, cu e siman aki ainda e lo anuncia, cu lo bay cobra bek pa parkeer den Centro di Oranjestad. Unaves cu bolbe cuminsa cobra e vaknan geel lo bira druk atrobe. E demanda ta basta grandi, pa paga pa haya un lugar pa parkeer, segun Minister Romero.

Paga pa parkeer sigur tin su beneficienan, pasobra e Parkeer Rangernan ta controla tur auto, no solamente si nan a paga, pero e hecho cu nan ta pasa banda di e autonan ta ser considera un forma di proteccion contra ladronicia.

Gobierno t’asina leu caba cu a identifica cierto area, cu lo ta pornada y na cierto area lo bay na elimina e parkeervaknan geel. Pa april awor, esta otro luna tur hende lo sa kico t’e maneho nobo, pero prome cu esaki lo bin cu programanan di informacion, unda por parkeer y unda no.

Parkeerklem, esey sigur lo no bolbe, Minister Chris Romero a garantisa. Mientrastanto pa loke t’e compania AruParking, esaki mas bien ta perdiendo placa y Gobierno mester sigui subsidi’e.

INTERUPCION DI CORIENTE

En conexion cu trabaonan necesario, coriente lo wordo interumpi den vecindario di:

- MFA Savaneta
- Savaneta (e parti nort) for di caminda di Jaraweg te cu Seroe Alejandro (un parti)
- Jara Complex
- Generaal Majoor de Bruynewijk (un parti)

DIAHUEBS 14 DI MAART, 2019

FOR DI 8:30 AM PA 4:00 PM

Elmar ta pidi disculpa pa e inconvenencia cu e interupcion aki por causa.



ELMAR
Redefining Energy

Danki pa e comprension

523 7100 | customerservice@elmar.aw

Control na sitionan di coba santo ta pa segura cu leyman existente ta wordo respeta

Minister Oduber a aclaria situacion di cobamento di santo cerca companianan

DIALUNA mainta Minister di Desaroyo Teritorial, Infraestructura y Medio Ambiente sr. Otmar Oduber conhuntamente cu Minister di Husticia, mr. Andin Bikker, Director di DOW, ing.. Marlom Croes y Director di DIP sr. Haime Croes a reuni cu varios compania/contratista pa trata e tema di cobamento di santo/kibramento di piedra.

E reunion aki a tuma lugar despues di si-man pasa Departamentonan di Infra a hiba control na diferente di e sitionan unda cu ta cobando, pa cual inmediatamente a stop esnan operando sin permiso.

Como consecuencia di esaki e companianan a presenta na Bestuurskantoor pa expresa nan opinion y preocupacion y ricibi claridad riba locual ta tumando lugar. E reunion a bay den bon ambiente y a acalaria mal comunicacion cu tabatin di ambos banda.

Manera ta conoci na december 2018, a publica den Landscourant un Landsbesluit firma pa Gobernador y Gobierno di Aruba cu e rekisitonan pa un aanlegvergunning. Esaki a sosode atraves di e ley *Landsverordening* Ruimtelijke Ontwikkeling (LRO) cu tin su maneho anca pa loke ta trata Ruimtelijke Ontwikkelingsplan (ROP).

Esaki ta encera cu ta exige un aanlegvergunning for di tur hende cu ta rosa un tereno mas cu 750 meter cuadra, pa nan por haya e permiso necesario pa rosamento.



Esaki den cuadro di preservacion di nos naturalesa y medio ambiente. Banda di rosamento tin e aspecto di cobamento di santo/piedra y otro materialnan for di superfisie, pa cual tambe ta exige pa tin un aanlegvergunning.

Diabierna un task force consistiendo di diferente departamento di Gobierno a hiba control na diferente di e sitionan aki rond Aruba. E control aki a tuma lugar despues di dos luna cu e acuerdo a wordo formalisa y publica. 9 Compania cu ta coba santo/kibra piedra a wordo bishita pa cual a resulta cu 3 di e companianan n'e momentonan ey tabatin peticion haci pa un aanlegvergunning.

Despues di e bishita di e task force, 2 compania mas a haci peticion pa un aanlegvergunning. Pues di e 9 nan cu a wordo bishita, un total di 5 compania actualmente tin un aanlegvergunning pidi na DIP. Ley ta bisa cu dentro di 30 dia e departamento mester duna contesta riba e peticion aki, Minister Oduber a informa.

BO MESTER DI WASTE BUCKET RESIDENCIAL OF COMERCIAL?

ecotech GROUP

YAMA

Mr. Bucket

594-3757
mrbucket@ecotech.aw

20 yrd Big Bucket

15 yrd Junior Bucket

10 yrd Small Bucket

Sigui na pagina 7 >

ACCION DILANTI BESTUURSKANTOOR

Esnan cu a bishita Bestuurskantor dialuna mainta cu nan preocupacionnan pa gran parti (90%) tabata trata di companianan cu ta transporta santo/piedra. Pues no necesariamente esnan (10%) cu tin e deber segun ley pa pidi p'e aanlegvergunning pa nan por haci e trabou di cobamento cu ta tuma lugar rond Aruba.

Reunion cu e companianan a bay den un ambiente sumamente positivo. Di ambos banda tabatin 'lessons to be learned' hopi cu tabatin di haber cu falta di comunicacion y informacion cu no a yega cerca e grupo. E companianan a compromete pa haci peticion manera cu ley ta prescribi pa un 'aanlegvergunning' pa cual DIP su portanan ta habri pa asisti e diferente companianan cu ainda no a haci esaki, Minister Oduber a duna di conoce.

Un informacion cu no tabata mucho cla p'e grupo di companianan tabata: Desde ki tempo e ley ta existi. Pa cual a splica cu e ley ta vigente desde 2009, pero for di aña pasa cu a haci e decision aki conoci atraves di un Landsbesluit, ta activa e parti di ley, pa cual e controlnan a inicia.

E control conduci ta riba destruccion intensivo na momento cu ta coba santo of kibra piedra etc. na diferente parti rond di nos isla.

'Segun cifranan di Departamento di Naturalesa y Medio Ambiente (DNM) tin mas o menos 31 sitio cu cobamento lo por tabata tuma lugar. Ta calcula cu mas o menos 60% di e 31 sitionan aki ta activo. E otronan a wordo uza den pasado, pero aworaki no ta wordo uza mas.

Manera menciona anteriormente 9 di e companianan aki ya a wordo bishita y otronan lo wordo bishita den e proximo dianan.'

Finalmente Minister Oduber a splica cu no ta solamente un aanlegvergunning ta wordo existi den caso cu ta coba santo entre otro. Tambe tin e aspecto di cu si e compania ta causa molester t'e becindario y/of na comunidad nan mester di un hindervergunning tambe.

Esaki no ta conta solamente p'esnan cu ta kibra piedra, pero ta encera molester di por ehempel zonido y polvo entre otro.

Departamento di Bureau City Inspector a wordo instrui conhuntamente cu DOW, DIP, DNM y Kadaster pa conhuntamente cu Cuerpo Policial bishita e diferente instancianan aki.



AUCTION

THURSDAY MARCH 28, 2019

On Thursday March 28, at 11 AM, at the Conference Room of the Chamber of Commerce, Aruba, will be auctioned in public. ex. art. 3:268 jo. 3:254 Civil Code of Aruba:

1.620 m2 PROPERTY LAND IN CALBAS (EMPTY LOT)

a parcel of property land, 1.620 m2 in size, situated at Calbas in Aruba, as further described in a private measure document SUA-NV nr. 1864/2016, being a part of the parcel locally recorded as First Division Section L number 146.

Starting bid: Afl. 259.200,--

A residential house locally known as

TANKI LEENDERT 123-N

standing on a parcel of property land, ca. 233 m2 m2 in size, situated at Tanki Leendert in Aruba, being a part of the parcel locally recorded as First Department Section L number 533, with index number D 2925.

Starting bid: to be announced

AUCTION NOTARY: T.R. JOHNSON

- The auction is subject to the general conditions for foreclosure auctions and special auction conditions which will be determined by civil law notary T.R. Johnson.
- The auction will take place by raising bids (in Dutch: "bij opbod") and by decreasing bids (in Dutch: "bij afmijning"), in one session.
- Seller has the right to not accept any bid, at his sole discretion.
- The auction may be stopped or postponed at any time.
- Each bidder must be able to submit a bankguarantee issued by a reputable bank in Aruba to the amount of the highest bid increased with an amount equal to the auction costs.
- A private written bid can be submitted until March 13 2019, 5 PM.

For more information:

WWW.JOHNSONNOTARY.COM

Dos auto a bolter riba Sasaki, simultaneamente



DIADOMINGO anochi pa mas o menos 11'or Polis a bay cu urgencia riba Sasaki, pa ta exacto den e area di ex House Of Cheng. Informacionnan cu a drenta tabata bisa cu auto a bolter y tin hende herida.

Departamento di Trafico tambe a pura pa yega, y asina pone nan mes na altura di e accidente aki.

Mesora na nan yegada a laga cera rotonde Superfood bay nort y tambe a parti pabou banda di ex House of Cheng.

Esaki debi cu ambos banda tabatin rastronan di e accidente. No tabata trata di solamente 1 auto cu a bolter sino 2. Debi n'esaki pal'i luz a wordo completamente ranca.

Esnan involvi tabata levemente herida. Polis a wordo informa tambe cu un di e ocupantenan, aparentemente un chauffeur a bandona e sitio canando bay nort riba Sasaki mes.

Polis a bay tira bista den e becindario, pero no ta logra topa cu e homber aki.

LOKE A SOSODE SEGUN UN CHAUFFEUR

Segun chauffeur di e auto Honda Accord, e tabata bayendo nort probablemente duro y bou di su auto e tabata usando un spare tire. Esaki segun su persona lo pone cu e auto a cuminsa perde control cu consecuencia ya menciona.

Patras di e Honda tabata biniendo un Mitsubishi Lancer, esaki tambe a perde control y bolter pa na final bay pega contra e pal'i luz. N'e sitio nos a compronde cu e chauffeur aki t'esun cu a bandona sitio dor di cana bay nort.

Polis di Trafico a tene e caminda basta rato cera, pa por a haci nan investigacion.

Ambos vehiculo a wordo confisca y hiba Warda di Balashi, unda lo haci investigacion riba nan.

RECORDATORIO

Ultimo dia pa paga factura di coriente pa e luna di **januari** 2019 ta:


DIAHUEBS - 14 maart 2019

POR HACI PAGO NA:

- Tur Banco Comercial
- Tur MFA
- WEB Aruba N.V.
- N.V. ELMAR

EVITA PARA DEN FILA LARGO Y PAGA ONLINE

Por favor menciona e number di cuenta cu ta aparece riba e factura di coriente como descripcion di pago.



523 7100 | customerservice@elmar.aw

Generator horta for di ex club Chines

DIABIERNA anochi Polisnan a bay atende un caso na San Nicolas, unda cu ladronnan a drenta edificio y a trata di bay cu diferente material pa construcion.

Tabata despues di 8'or di anochi cu Polis ta wordo manda na un edificio den Helfrichstraat (Ex Chinese Club) relaciona cu un caso di kiebra. Na e sitio e Polisnan ta papia cu e denunciante di inicial W. E ta declara cu e dia prome el a bay for di e sitio lagando e luga intacto y cera completamente na lock.

W a conta e polisnan cu algun rato prome el a bolbe yega na e luga y a ripara cu e slot a wordo kibra y cu personanan desconoci cu a drenta paden a bay cu algun cos. El a tira un control rond y a constata cu an a bay cu un generator color blanco skirbi 1200 WATT riba dje. Tambe a bay cu un mashin di mula marca Black & Decker (oranje cu preto). Pafo di e Club, den e cura, el a haya un betonschaar tira den bari di sushi y banda di e bari a haya e slot kibra. Denuncia a wordo tuma.

Ladron a laga cas tur reboltea den cas

DIASABRA ultimo un poco prome cu 6'or di atardi Central di Polis ta manda un patruya di Santa Cruz na un cas den e bario pa un caso di kiebra.

Nan ta bay na e sitio y ta papia cu e homber di inicial L., kende a conta e Polisnan cu un persona a drenta su cas sin su permiso. E persona (9nan) aki a drenta via di bentana di su camber. El a conta cu rond di 12.30, prome cu el a sali, el a cera tur bentana di cas, inclusive esun di su camber via cual nan a drenta paden.

Ora cu el a yega cas pa 17.40, mesora el a constata cu nan a kibra drenta su cas. Su camber tabata tur reboltea y e shutternan di e bentana di su camber a wordo saca pa e ladron por a drenta paden. Polisnan a papia cun'e pero e no por a corda mesora kico nan por a horta den su cas. A bis'e cu e por pasa na Warda di Polis despues di control y constata cu e ta sinta falta di algo.

Johnson
notary services

AUCTION

THURSDAY MARCH 28, 2019

On Thursday March 28, at 11 AM, at the Conference Room of the Chamber of Commerce, Aruba, will be auctioned in public. ex. art. 3:268 jo. 3:254 Civil Code of Aruba:

A residential house, locally known as

SABANA BASORA NOORD
126

standing on a parcel of public land, 197 m2 in size, situated at Sabana Basora in Aruba, locally recorded as Third Division Section G number 2735. The lease rights expire on December 14, 2065.

Starting bid: Afl. 50.918,--

A residential house, locally known as

MADIKI KAVEL 97

standing on a parcel of public land, 417 m2 in size, situated at Madiki in Aruba, locally recorded as First Division Section K number 1459. The lease rights expire on November 20, 2045.

Starting bid: Afl. 195.000,--

AUCTION NOTARY: T.R. JOHNSON

- The auction is subject to the general conditions for foreclosure auctions and special auction conditions which will be determined by civil law notary T.R. Johnson.
- The auction will take place by raising bids (in Dutch: "bij opbod") and by decreasing bids (in Dutch: "bij afmijning"), in one session.
- Seller has the right to not accept any bid, at his sole discretion.
- The auction may be stopped or postponed at any time.
- Each bidder must be able to submit a bankguarantee issued by a reputable bank in Aruba to the amount of the highest bid increased with an amount equal to the auction costs.
- A private written bid can be submitted until March 13 2019, 5 PM.

For more information:

WWW.JOHNSONNOTARY.COM

Habitante a filma personanan sospechoso cu a menas'e

DIASABRA un señora saliendo for di cas ta topa cu dos persona para riba caya den forma hopi sospechoso pa cual el a dicidi bati alarma na Polis.

Tabata un poco prome cu 11'or di mainta cu Polis ta wordo manda na un cas den Panamastraat pa un persona indesea.

Na e sitio e Polisnan ta papia cu e señora di inicial O., kende ta conta nan cu rond di 10:20 di mainta el a mira tres homber desconoci banda di su cas. E hombernan aki tabata para riba e porta di cura di un cas situa den Panamastraat. Loke ta straño ta cu e cas en cuestion ta bandona.

El a mira cu e tres hombernan tabata den discusion cu otro. Como cu el a haya un poco di miedo, el a cana bay na su auto, mientras cu e hombernan a sali di e cura.

Pa cualkier eventualidad el a dicidi filma e personanan aki cu su celular, pero nan a mir'e. Un di nan a lansa un menasa contra di dje. E homber a coy un piedra for di suela y a haci intento pa dal'e cun'e. Despues e homber a cana bay direccion di e cas dilanti di esun bandona y e mes a move for di e sitio.

A informa e señora cu si e kier entrega keho, m e por haci esaki na Recherche na Playa mientras cu

Chauffeur pata pata deteni durante control

DIADOMINGO rond di 2.10 di madrugada un chauffeur pata pata burachi tabatin e mala suerte di a bay pasa unda Polisnan ta controla. Mesora el a wordo deteni. Polisnan diadomingo den ornana di madrugada a bay para Caya Ernesto Petronia banda di Postkantoor pa tira un control den trafico.

Di repente a mira un auto marca Toyota, color blanco cu tabata biniendo zuid riba Caya Ernesto Petronia. E Polis a mira cu e auto tabata core zig zag riba caminda. E chauffeur a wordo para mesora.

Ora cu e Polis a bay pa papia cun'e, a mira cu e ta muestra basta bou influencia di alcohol, wowonan cora cora, su rosea ta hole alcohol y e no por a move bon. Ora cu el a baha for di e vehiculo, esaki a keda confirma pasobra di baina e por a para riba su pianan y tabata cana hopi "slow". El a tuma hopi tempo pa contesta preguntanan. A pidie pa supla den e aparato di test chauffeurnan, pero ni esaki e no a logra haci. A dicidi di detene y transporte pa Warda di Polis na Playa, unda cu el a wordo presenta dilanti di Fiscal Auxiliar, a haci un otro test cun'e pa despues haya un cuarto gratis.

Ministerio Publico a bay den apelacion contra cinco sospechoso di Ibis

Ministerio Publico a apela algun di e casonan penal den e investigacion Ibis. Pa ta mas exacto, den e casonan penal contra ex-minister C. y cuatro di e otro sospechosonan.

Ministerio Publico no ta wak motibo pa bay den apelacion den e otro casonan.

Ministerio Publico ta de acuerdo pa gran parti cu e decisionnan y argumentacionnan amplio di Corte den Prome Instancia. Den tur e casonan aki tabatin condenanan pa ambtelijke omkoping y/of un of mas mas otro hechonan castigable.

Na St. Maarten

Ruman ta tira su ruman mata



PHILIPSBURG - Polis y Departamento di Recherche ta investigando un caso di tiramento cu a tuma lugar dia 9 di maart ultimo pa mas o menos 10 or di anochi riba e caminda Tangerine road na Sint Peters.

Ta masha yamada a drenta na Departamento di Emergencia pa manda autoridadnan cu maximo urgencia, pa un caso di tiramento patras di Desam Supermarket na Tangerine Road.

Inmediatamente masha Polis a ser manda n'e sitio di incidente, mientras cu Recherchenan a cuminsa cu nan investigacion. N'e sitio, e oficialnan a bin haya e victima masculine ta sangra for di multiply heridanan di balanan reci den su curpa.

El a ser atendi inmediately p'e paramediconan y a keda transporta cu maximo urgencia pa Sint Maarten Medical Center. E area a ser sera pa Departamento Forensico por colecta evidencia y pa por papia cu testigonan potencial.

N'e sitio, a bin tende cu e sospechoso ta un ruman homber di e victima, kende inmediately a keda deteni. E\$ victima a keda identifica como R.B. E sospechoso a keda deteni y hiba pa Police Headquarters na Philipsburg unda el a ser sometido na interrogacion pa sa kico t'e motibo cu el a tira su ruman mata.

Johnson
notary services

AUCTION

THURSDAY MARCH 28, 2019

On Thursday March 28, at 11 AM, at the Conference Room of the Chamber of Commerce, Aruba, will be auctioned in public. ex. art. 3:268 jo. 3:254 Civil Code of Aruba:

A residential house, locally known as

MADIKI KAVEL 1-B

standing on a parcel of public land, 794 m² in size, situated at Madiki in Aruba, locally recorded as First Division Section N number 1611. The lease rights will expire on September 14, 2059.

Starting bid: Afl. 214.000,--

A residential house, locally known as

POS CHIKITO 70-D

standing on a parcel of public land, 298 m² in size, situated at Madiki in Aruba, locally recorded as Third Division Section G number 2353. The lease rights will expire on August 1st, 2038.

Starting bid: Afl. 351.000,--

AUCTION NOTARY: T.R. JOHNSON

- The auction is subject to the general conditions for foreclosure auctions and special auction conditions which will be determined by civil law notary T.R. Johnson.
- The auction will take place by raising bids (in Dutch: "bij opbod") and by decreasing bids (in Dutch: "bij afmijning"), in one session.
- Seller has the right to not accept any bid, at his sole discretion.
- The auction may be stopped or postponed at any time.
- Each bidder must be able to submit a bankguarantee issued by a reputable bank in Aruba to the amount of the highest bid increased with an amount equal to the auction costs.
- A private written bid can be submitted until March 13 2019, 5 PM.

For more information:

WWW.JOHNSONNOTARY.COM

Ayo Pachi!



Polisnan movecion na beachnan banda di hotelnan



DIADOMINGO mainta patruyanan di Noord a bay tira un control riba beach, specialmente pasobra e ta un dia cu hopi hende ta haci uzo di lama y pa mira si nan ta cumpli cu ley y reglanan.

E control aki a tuma luga for di 10'or di mainta te cu 11.30 di merdia.

Ademas di esey, nan a tira bista riba personanan sospechoso relaciona cu robonan di auto cu ta staciona banda di beach. A constata cu tabatin varios auto cu plachi blauw cu ta coriendo rond. Rona di 10.40 a constata algun auto para na banda di caminda, cerca di e negoshi nobo Denn's. Un di e chauffeurnan cu tabata presente a haya un PV.

E patruya sigui bini direccion pazuid y a constata cu banda di e Toren na Bubali Plas tin cantidad grandi di saco di sushi pon'i, na rand di e awa, panort di e toren. A pone Serlimar na altura di esaki pa nan pasa haci e area ey limpi.

Pa 11.10 nan a topa un situacion panort di Amsterdam Manor unda cu mester a hala atencion di e personanan. Tabatin un famia cu tabata haciendo BBQ riba e beach panort di Amsterdam Manor. A papia cu e homber di inicial M., y a splik'e cu ta prohibi pa pone obhetonan riba beachnan publico sin permiso y cu uso di BBQ Pit tambe.

El a muestra comprension y a bisa cu e lo tuma e responsabilidad pa haci e area ey limpi. Rond di 11.20 e Polisnan a mira algun auto cu tabata para tambe riba e beach na Eagle Beach. Pero e chauffeurnan no tabata presente.

Diabierna tambe Polisnan a controla na e beachnan y e dia ey si a topa cu e chauffeurnan a pone nan auto riba e santo blanco.

Diabierna mainta Polisnan a bay tira un control banda di area di hotel y a bin topa cu un vehiculo staciona riba beach.

E auto aki tabata staciona riba e caminda secundario di Eagle Beach y tabata trata di un Kia SPORTAGE color blauw y un Hyundai H-1 color blanco. A busca pa e chauffeurnan den henter e bisindario y finalmente despues di un rato a bin haya nan.

A splica e chauffeurnan, kendenan tabata turista, cju ta prohibi pa staciona auto riba beach, y nan no tabata sa esaki. Nan a pidi nan disculpa y a priminti di lo no haci esaki mas. Polis a mira cu nan a kita e autonan for di riba beach.




Serlimar Sui Generis

ta informa tur cliente

E schedule residencial en conexion cu **dialuna** dia di celebracion di **18 di maart 2019** ta lo siguiente:

- 19 MAART • RUTA DI DIALUNA
- 20 MAART • RUTA DI DIAMARS
- 21 MAART • RUTA DI DIARANZON
- 22 MAART • RUTA DI DIAHUEBS
- 23 MAART • RUTA DI DIABIerna



Serlimar




Jerwin Hernandez & Maryann Rodriguez - "Aruba ta Vida" a gana festival



Fundacion Cultural di Festival Folklorico kier a manda palabra di pabien pa tur e participantenan cu deleita e pueblo di Aruba cu nan cancion, PABIEN!!!
Ganadornan di Festival Un Canto pa Aruba, su Himno & su Bandera Adulto 2019!
3er Lugar: 1140 Punto - Ruth Gaarie - " Unda ku bo por ta "
2ndo Lugar: 1160 Punto - Sidney Simoons - " Cante, Amor pa Aruba "
Ganadornan Absoluto 2019:
Cu 1210 Punto - Jerwin Hernandez & Maryann Rodriguez - " Aruba ta Bida "

Fundacion Cultural di Festival Folklorico kier a gradici cada un sponsor y cada un persona cu a contribui cu e festival pa a haci esaki posibel!



Xpresa bo mes

PA decadanan Aruba a ser domina dor di e isla mas grandi cu ta Corsou. Pueblo y politiconan a sinti cu nan no por sigui biba bou di e circunstancia aki y t'aki na unda e lucha a cuminsa pa Aruba para riba su propio pianan.

Tabata un lucha tenaz casi perdi. Un lucha cu a nace cu hopi fervor, pero poco poco a muri na caminda, apesar cu un fundeshi firme a ser estableci.

Ta den decadanan 50 cu UN a bisa cu tur pais miembro mester deshaci di nan colonianan y asina Hulanda a forma un comision cu representante di tur pais den Reino, esta Suriname, Antiyanan Hulandes.

Bou di Antiyanan Hulandes tabatin representante di Aruba, Bonaire, St. Maarten.

Suriname a boga pa bira independiente na año 1975 y Antiyanan Hulandes na año 1977. Pa haci e historia cortico, Corsou, pa medio di señor Juancho Everts dfm a pone e piedra den caminda pa asina Antiyanan Hulandes den union no a bira independiente na 1977.

E tabata kier un republica di "one man one vote", cu otro palabra nunca Aruba o otro islanan por yega na haya un Presidente, dor cu Corsou ta mas grandi y tin mas habitante, mas voto.

Aki ta na unda e lucha pa Status Aparte a nace atrobe bou liderazgo di Betico Croes dfm.

Mi por scirbi mas riba esaki, pero na unda mi kier bay ta cu nos lucha semper ta pa sali for di e dominio di e isla mas grandi, esta Corsou, no di Hulanda.

No tabata un lucha facil, pero Aruba a logra su Status Aparte dia 1 di januari 1986.

Nos a bira un pais para riba nos propio pianan, formando parti di Reino Hulandes. Tur decision por a ser tuma aki na Aruba mes, Aruba cu su propio Gobernador, propio Parlamento, propio Gobierno, propio Banco Central etc. Tur decision por a ser tuma aki na Aruba mes, sin Hulanda tin algo di bisa nos.

Aki tambe ta na unda fiesta na poder a cuminsa dor di tur partido, dor di tur Gobierno, despues di nos Status Aparte.

Por menciona: Interes pa sirbi pueblo a bira interes personal. Nomenclatura dor di tur Gobierno di un cantidad di empleado publico, pa cumpli cu promesa di campaña.

Persecucion di directornan di departamentonan, hefenan di servicionan dor di tur Gobierno. Un cantidad ainda riba non actief, pero ganando placa di pueblo. Sin cu ta nan culpa.

Nomenclatura di conseheronan cu salarionan y otro beneficionan barbaro, neglizando tur director y hefenan.

33 Aniversario di nos Status Aparte ta algo di celebra?

Pa: Atan Lee Sr.

Catiri 5-C

Aruba - Dutch Caribbean

Trahadornan publico ta dicidi kende nan ta kita y pone como director o hefe. Gobiernonan tabata bay di acuerdo, debi cu nan tin miedo pa perde voto, poder ta mas importante.

Leynan ta ser cambia, pasobra tin manifestacion dilanti BC, tristo, pero berdad.

Reglamento na granel di tereno di pueblo, na famia, amigo y stranheronan sin un clase di control.

Corupcion na granel den tur sentido di palabra y sin control, ora descubri ya miyones a ser horta. Den tur departamento y servicionan.

Corupcion dor di di propio mandatarionan y sin medida. Famia y amigonan ta bin na prome lugar dor di tur Gobierno, pero tur, un free for all.

Parlamento a bira un campo di bataya, na unda palabranan menos bunita ta cay den tur reunion y hasta birngamento.

Un Parlamento sin un clase di control y e mas tristo y mal ehemplenan ta sali for di cas di pueblo. Un stempel parlament.

Un sistema hudicial y autoridad sin por tuma desicionnan correcto. Leynan bieu, abuso di mucha sin control. Problemanan social catastrofico.

Ley pa uso di droga den porta di Cas di Pueblo pa ser aproba, sino fono.

Finanza publico ta un desaster dor di tur Gobierno. Medidanan disciplinario dor di Hulanda riba cabez di tur Gobierno. Cu CAFT ta practicamente Hulanda ta dicidi, debi na mal uso di placa di pueblo. Un presupuesto cu no tin areglo.

Empleadonan publico ta traha con y ki ora cu nan kier. Nan habri y sera manera ta nan ta Goberna.


Cu dolor como un luchador pa nos Status Aparte, mi a scirbi esakinan, pa laga pueblo reflexiona si enberdad nos tin derecho pa celebra nos di 33 año di nos Status Aparte, canta nos himno cu amor y mira nos bandera bula cu tur orguyo.

Despues di tempo mester realisa mihor cu nos a bira un provincia di Hulanda, na unda nos tin nos mes un Gobierno provincial cu tur derecho pa tuma tur decision, pero cu un control severo di Hulanda.

Aruba no por bira un pais manera otro paisnan den nos region, na unda interes personal ta prevalece riba interes di pueblo. Na unda sirbido di pueblo a bira sirbido di su propio interesnan. Na unda corupcion ta den luz di dia, tanto cu tereno di pueblo y fabornan politico a cambio di placa.

Nos tin demasiado hende inteligente, intelectual pa laga tur esaki sigui sosode. Pa bisa berdad celebracion di nos Status Aparte no tin sentido.

Accidente riba subida di Lago heights



DIALUNA mainta trempan den careda di 7'or polis ta bay subida di Lago Heights pa un accidente di auto.

Na yegada nan a topa cu un Toyota Vitz y un Mitsubishi Outlander. Segun polis a compronde e Vitz a slip den e bocht y bay dal contra e Outlander cu tawata subiendo.

Awacero lo a hunga un rol, causando cu e Toyota Vitz a slip. Un persona a resulta levemente herida, pero net e momento eynan no tawata tin ambulance disponibel.

Alarma Central mester a saca un pick up di Ambulance, esta e Rapid Responder pa atende cu e persona herida.

Ambos auto a sufri dañonan considerabel. Takelwagen a ser pidi pa move ambos for di caminda.

Dos auto a sunchi otro na Cumana



DIALUNA mainta pa mas o menos 9'or polis y ambulance a bay un accidente na Cumana.


Na yegada nan a topa cu dos auto ariba caminda, un tras di otro. Tawata trata cu un a dal tras di e otro.

E autonan involvi tawata un Nissan Sentra y Ford Ecosport.

E Ford no a tene suficiente distancia y a dal patras di e Nissan.

Na yegada di Ambulance Paramediconan a controla un homber cu a resulta levemente herida.

Problema di pareha entre dos muher a caba cu uno herida pa boter kibra



DIADOMINGO anochi pa mas o menos 7:40, Polis a wordo informa di un pelea y cu un hende herida. E persona lo a wordo corta cu un boter.

Segun testigonan, ora nan a yega cas nan a topa dos muher discutiendo mey-mey caminda y boter a wordo kibra y un di nan a resulta herida.

Momento cu un di e muhernan a wordo corta e lo a bay busca ayudo n'e apartamento na banda.

E dos muhernan cu a discuti y bay asina leu cu un a resulta corta, ta turista, ambos ta papia ingles. Esun cu a herida e amiga, a bay paden y na prome instante sea a bay drumi y no tabata reacciona cu Polis tabata bati e porta p'e sali.

Polis a pasa patras pa tira bista, pero no a nota nada cu e muher por a sali. Despues di un rato Polis a habri e porta y a bay paden papia cu e otro muher.

Na final di e incidente esun herida no lo tabata kier a entrega keho. E otro muher a sali y a bise esun herida cu apartment y auto di huur tur cos ta riba su nomber. Mirando cu keho lo no wordo entrega, tur Polis a bandona e sitio lagando nan pa nan cuenta. Ambulance tampoco a yega e sitio.

Pa proteha salud di nos comunidad:

E proceso di señala, raporta y diagnostica malesanan infeccioso ta di sumo importancia

DEPARTAMENTO di Salud Publico ta sigui vigila e situacion di malesanan infeccioso den nos region unda Venezuela y Brazil ta entre e paisnan cu mas caso registra.

Recientemente servicio di malesanan infeccioso di Departamento di Salud Publico a invita Dr Karen Lewis-Bell, sub-regional advisor, immunization di PAHO pa provee nos cu informacion riba prevencion y tambe ayudo den controla y mehora nos sistema di vigilancia y registracion di malesanan infeccioso, manera p.e. Measles, Mazelen y Sarampi Aleman.

Durante su bishita di 3 dia, dr. Karen Lewis-Bell riba su prome dos dianan a dedica na haci un evaluacion di e situacion di e programa di vacunacion na Aruba.

Tambe el a duna un presentacion na dokternanan di cas tocante e menasa di un brote di malesanan infeccioso cu atencion principalmente riba Sarampi Aleman, Rubella, Rubella Congenital y e importancia di señala, diagnostica y raporta esakinan.


Por ultimo a ehecuta un “measles outbreak training” cu empleadonan den salud di Departamento di Salud Publico y Wit Gele Kruis.

E training ta di sumo importancia mirando con Sarampi Aleman (Mazelen) ta haciendo su entrada bek den cierto region y paisnan cu pa añanan no a mira casonan di Sarampi Aleman. E motibo di esaki t’e campananan anti-vacuna cu ta causando cu baby y muchanan ta keda contagia y ta causando brote caminda tin hasta casonan fatal.

Den Caribe y Latino America a presenta casonan recientemente importa di Europa. Merca ta conociendo un brote basta grandi e ultimo simannan.

Venezuela y Brazil tambe tin brotenan actualmente. Aruba cu ta un isla turistico no por evita cu un caso di Mazelen por drenta, pero si nos ta prepara nos profesionalnan pa atende y reconoce e malesa mas liher posible y asina evita brotenan innecesario.

E bon di e malesa aki ta cu ta existi un vacuna cu ta



duna proteccion di 99% despues cu ricibi e di dos vacuna pa bida largo.

Tur esaki a wordo discuti y atendi pa por actua den caso cu Aruba wordo confronta cu un caso sospechoso y/of confirma.

Prome tienda di chuculati a habri su portanan

Chocoglam, The Art of Making Chocolate



DIASABRA anochi mei-mei di amigo y familiarnan, Nelkis Arends a habri e prome tienda di chuculati yama Chocoglam The Art of Making Chocolate...

E proyecto aki a cuminsa 4 aña pasa den un forma masha chiquito, pero poco poco e confiansa mei-mei di su clientenan a bira mas grandi y Nelkis tabata prepara su chuculatinan pa fiestanan di cumpleaños ... ricibimento. Dia di Mama y pa cualkier celebracion Chocoglam ta cla na bo servicio ...

Chocoglam ta traha chuculatinan cu diferente sabor manera cu caramel... orange... kiwi... pinda, almendra... sugar free... papaya ...coco... lamunchi ...dark chocolate...white chocolate y diferente areglo tambe manera su strawberry... marshmallow .. y hopi hopi mas.

Chocoglam ta situa na Boegoeroei riba e caminda principal entre Imeldahof y veld Frans Figaroa banda pabou di caminda awor cu Dia di Mama ta acerca of pa ricibimento por yama 743-4838 of por pasa busca pa savoria un dushi chuculati..

Nelkis cu su casa Alvin y nan yiu Alviana a corta e cinta... Nos ta desea famia Arends tur clase di exito cu Chocoglam.

Participacion di Aruba Doet y Unity Carnival Group den Carnaval 65 un exito rotundo!

ARUBA Doet y Unity Carnival Group a uni forsa un biaha mas y mas cu claro tabata presente durante e dos parada grandinan di Aruba su Carnaval 65.

Hunto cu un grupo di persona cu diferente tipo di limitacion, pero yena cu oportunidadnan a join un di e fiestanan cultural di mas grandi na Aruba. Por a nota sigur e entusiasmo di e grupo, caranan contento y creatividad durante ambos parada. Participantenan a baila riba musica deleita pa Hot Ones Band y asina a promove inclusion y a segura cu e grupo a gosa bay goal.

E team di Aruba Doet y Unity Carnival Group kier gradici tur partner y boluntario cu di un manera of otro a duna un man na e bunita proyecto aki.

Masha masha danki pa yuda nos cu e F&B, pega stenchi, pone pluma, make-up participante, transporta carosa, instala banner, zorg pa nos tin bon zonido riba caminda, ambiente y mas! Masha danki p'e sosten y confiansa. Boso ta master!



Director sr. Andy Centeno di Ibero American High School:
“Un di e gran cosnan di e materia ta cu e ta aumenta autoestima.”

DEN cuadro di descubri identidad y proposito di nos hobennan, Desaroyo di Talento Certifica y Docente, sra. Sharleen Tromp recientemente a hiba su material titula: “Caracteristicanan di personalidad cu ta yuda estudiante alcanza exito” den forma di un lectura pa Ibero High School, como tambe Colegio San Nicolas.

Un materia diseña pa yuda hobennan compronde y balora nan mes - y esnan rond di nan - nan capacidad y habilidadnan como tambe nan debilidannan. Un materia, cu ta yuda individuonan compronde y acepta tanto nan mes, como esnan rond di nan.

“Un di e cosnan mas grandi di e materia ta cu e ta aumenta autoestima. E ta trece aceptacion propio, como tambe, pa otro. Mi ta aprecia e material, pasobra e ta educa nos studentenan con pa relaciona cu hende cu ta di diferente característica y actitud. Con nan por siña di no solamente bay bon cu otro, pero tambe di nan diferencianan.

Esaki ta un materia cu no solamente ta importante p’e studentenan, pero e ta hopi importante pa e staff, pasobra nos ta trata cu studentenan di diferente origen, actitud y comportacion.

Y e materia ta siña nos con pa trata cu nan den un manera mas amical. Enbes di frustracion ta bin realisacion y aprecio. Mi deseo ta pa duna esaki den grupo mas chikito den nos klasnan,” Director sr. Andy Centeno di Ibero High School a duna di conoce.

“M’a kere cu mi tabata manera e otro studentenan, pero manera nos a haci e ehercicio riba e banner mi a bin compronde cu nos ta hopi diferente for di otro y mi a identifica mi personalidad. Ami ta desea di studia comercio y locual mi a bin haya sa di mi mes awe, a haci mi masha sigur mes di e direccion aki,” Dwight Thomas Jr. estudiante di grado 11 - Ibero High School a bisa.

“E característica cu mi por a reconoce den mi mes ta cu ami ta un persona cu ta haci amigo facilmente, aunke bo no gustami, mi por pone bo gustami. Mi ta un storyteller y mi gusta encurasha hende. Mi ta contento di por a afirma tur esaki awe, den e materia di awe mainta,” Estudiante di Colegio San Nicolas H5, Fritz Remfort a



bisa.

“Caracteristicanan di personalidad cu ta yuda estudiante alcanza exito” a wordo diseña pa guia individuonan descubri nan identidad y proposito predestina p’asina nan por cana den nan debido direccion y desaroya nan capacidad como un lider den nan area di experticio. Dia 25 y 26 benidero lo bay tin un charla tocante e materia aki na Biblioteca Nacional. Na Playa dia 25 y San Nicolas dia 26. Esaki ta pa hoben y pa mayornan cu ta desea compronde nan yiunan mihor.

Artistanan famoso di Caribe a expone na ARToMoNDo y despues na henter Hulanda

DEN HAAG - Ministro di Sint Maarten, sr. Michael Somersall a habri un exposicion di algun artista famoso di Aruba, Corsou y St. Maarten, na ARToMoNDo, den centro di Deventer.

Despues di un presentacion den Gabinete di Ministro Plenipotenciario di St. Maarten na Den Haag y e prome exposicion na Delft, e exposicion especial aki por ser admira na ARToMoNDo, Nieuwstraat 20, te cu 16 di maart awor.

E pintornan cu ta expone: Sir Roland Richardson (www.rolandrichardson.com), Tess Verheij (<https://artistsofstbarth.org/collections/tess-verheij>), Melvin Anderson (www.melvinanderson.com), Bikkel (www.bikkelartist.com) y Gustave Nouel (www.gustavenouel.com) ta ser considera entre e artistanan mas conoci y/o internacionalmente reconoci di parti di nos Reino den Caribe.

Speranza ta cu despues di e cooperacion aki entre artistanan famoso di Aruba, Corsou y Sint Maarten, e iniciativa lo crece cu mas artista y disciplina di arte. E exposicion aki cu lo biaha den henter Hulanda lo purba habri porta p'esaki.


Annex tin oportunidad pa bishita un exposicion di 'Pintura di Oranje' di e pintor GN, cu ta biba na Deventer, den 'De Ontmoeting' net dilanti di 'ARToMoNDo', na Nieuwstraat 19-21.

Después di un bon-bini di sra. Marianne de Bakker di 'ARToMoNDo' y sr. Albert-Jan van Cloo di 'De Ontmoeting' y un discurso di President di Stichting Oranjefeesten Apeldoorn/Dutch Orange Company BV, sr. Simon Boon, e Loco-Burgemeester y Wethouder di Cultura na Deventer, sr. Carlo Verhaar a duna bon-bini n'e delegación di Sint Maarten.

Despues e exposicion a ser inaugura oficialmente pa Minister sr. Michael Somersall, na nomber di Minister Plenipotenciario di Sint Maarten. Despues di 16 di maart, e obranan aki lo ser exponi prome na Den Haag y finalmente na GROTE KERK di Apeldoorn.

Fin di 2017 Sint Maarten a ser destruí pa orcan Irma, e orcan más desastroso di su historia. Na Apeldoorn, riba Koningsdag 2018, e 'Estafette di Artre & Cultura pa parti di Reino St. Maarten' a start, pa juda e sector cultural di St. Maarten. Un iniciativa di Stichting Oranjefeesten Apeldoorn/Dutch Orange Company BV hunto cu Gobierno di St. Maarten y algun artista famoso di Caribe.

E iniciativa bunita aki pa yuda e sector cultural di Sint



Maarten por a conta cu apoyo di diferente autoridad, manera KBOV (Koninklijke Bond van Oranjeverenigingen) y varios sponsor, manera Royal Talens cu a regala un cantidad considerabel di material di arte na sector cultural di Sint Maarten. Un posibel fase 2 lo no focus mas riba ayudo, sino riba 'cooperación cultural' entre Aruba, Corsou y Sint Maarten na Hulanda, si política permiti esaki. Posiblemente Sint Maarten lo bira un ehempel di con algo hopi negativo por ser canalisa den cosnan hopi positivo pa henter nos Reino!

Academic Foundation Year na Universidad di Aruba



E Academic Foundation Year di Universidad di Aruba a cuminsa na 2016 y tin como meta pa guia studiantenan cu ta bay haci e transicion di educacion secundario pa educacion avansa, den nan desaroyo academico, nan orientacion y nan desaroyo personal. E porcentahe abou di studiantenan Arubiano cu ta termina nan estudio cu exito den educacion avansa na Hulanda ta reforsa e necesidad pa acerca educacion preparatorio na un otro manera.

Esaki tawata e motibo pa Universidad di Aruba inicia e programa en colaboracion cu Departamento di Enseñansa y Ministerio di Enseñansa y cu asistencia di Ministerio di Enseñansa, Cultura y Ciencia Hulandes. Den e prome tres añanan e cantidad di inscripcionnan a crece te na mas cu 70 estudiante na 2018. Na September di e aña aki e di cuater edicion di e programa exitoso aki lo cuminsa.

Na Merca y na Europa programanan similar ta existi, cu ta brinda studiantenan e oportunidad pa desaroya nan mes ariba tereno personal y academico en bes di tuma un gap year. Universidad di Aruba ta monitor e calidad y e efecto di e programa a base di evaluacionnan di educacion frecuente, hunto cu encuestanan bou di ex-alumnonan. E team di educacion ta consisti di un combinacion di docentenan (invita) local y internacional cual ta duna studiantenan e oportunidad pa cera conoci cu educacion y investigacion na e manera cu esaki ta wordo duna na universidadnan y institucionnan

pa educacion avansa. Bou guia di e team di docente, participantenan di e programa ta haya e oportunidad pa hinca nan propio curiculo den otro, pa percura cu nan ta wordo introduci na topiconan di estudio di nan escogencia.

Recientemente e Journal of Environmental Education Research a publica un articulo tocante e investigacion ariba e impacto di e concepto didactico di e Academic Foundation Year den e curso di Introduction to Earth & Environment. E publicacion aki a wordo skirbi door di docentenan invita Tobia De Scisciolo y Maarten Eppinga, hunto cu coordinador di e programa Eric Mijts. E enfoque di e investigacion tawata pa haya sa si e modelo didactico di e programa no ta enfatisa solamente adkision di conocimiento, pero tambe motivacion y un sentido di responsabilidad.

E resultadonan di e investigacion ta indica cu e modelo didactico ta aporta na un aumento significativo di e responsabilidad social di e studiantenan.

E resultadonan di e encuestanan y evaluacionnan ta demostra e impacto positivo di e programa ariba e desaroyo personal y academico di mayoria di e studiantenan. E team di Academic Foundation Year ta prepara pa asisti studiantenan cu ta ambia un desaroyo similar den e añanan venidero. Pa mas informacion, bishita <http://www.ua.aw/academic-foundation-year/> of via afy@ua.aw

Recordando e lucha pa nos Status Aparte:

E deseo di e pueblo Arubano pa su libertad a ser concretisa dia 12 di maart 1983

AWE 12 maart ta exactamente 36 aña pasa cu durante e Conferencia di Mesa Rondo (RTC) na Hulanda – bao guia di nos Libertador Betico Croes - a logra corona cu exito e lucha di nos pueblo pa su Status Aparte.

Aruba a inicia e proceso estatal na un manera acelera desde 9 di februari 1971, fecha cu a funda partido MEP, cu e meta primordial pa realisa e anhelo cu pa añanan largo tabata biba bao di nos pueblo. Desde e tempo ey a ser organisa varios cumbre politico pa por convence tanto e politiconan di Hulanda como esunnan di Antias cu e constelacion Antiano no ta un unidad berdadero y no tabata faborece Aruba. Ta den e cuadro aki a acepta den Eilandsraad mocionnan pa manda un delegacion, cu e instruccionnan necesario pa bay negocia na e Conferencia di Mesa Rondo na Hulanda, di dia 7 pa 12 di maart 1983. Nos pais tabata representa pa tur e partidonan politico, gremionan comercial, sindical y clero.

Logronan di RTC 1983

Locual nos a logra exactamente riba un dia manera awe 36 aña pasa ta encera entre otro lo siguiente:

1. Saliendo for di e derecho di autodeterminacion di cada un di e islanan, e conferencia ta acepta e resolucion di Aruba pa haci uzo awor di su derecho di autodeterminacion, door di scoge definitivamente pa independencia, cu mester wordo realisa na aña 1996. E fecha aki lo wordo poni den Statuut. Hulanda lo duna su aporte pa Aruba haya reconocimiento di derecho internacional. Alabes cu prome cu 1996 lo wordo teni un conferencia di evaluacion entre Reino y Aruba, pa eventualmente examina e fecha di independencia di Aruba, den luz di evolucion estatal entre e paisnan di Reino.
2. E conferencia ta bay di acuerdo tambe cu Aruba como fase transitorio prome cu independencia ta haya un periodo di 10 aña. Mientras tanto Aruba lo haya un Status Aparte cual ta posicion como pais autonomo den Reino Hulandes a base di Statuut. E status aki lo inicia dia 1 di januari 1986. Tabatin den total 33 punto di conclusion di RTC.

De kogel is door de kerk

Na e Conferencia di Mesa Rondo, e lider y vocero di e delegacion Arubano Betico Croes a acepta e exigencia cu Hulanda a impone, esta cu Aruba mester yena e fecha di Independencia, pero el a percura tambe pa hinca un clausula hopi importante den e acuerdo cual ta un conferencia di evaluacion y cu posibilidad di posponemento di e fecha di independencia



(Ex-Prome Minister Nelson Oduber a logra pa scrap e fecha di 1996 for di den Statuut dia 13 di juli 1990!). E logro di Status Aparte a sorprende tur hende, hasta e ex-Minister Presidente di Hulanda Ruud Lubbers, kende na final di e conferencia a expresa “De kogel is door de kerk” y cual ta simbolisa e culminacion di e lucha largo cu Aruba mester a hiba pa yega na e logro di Status Aparte. E acuerdo historico aki a ser firma pa ex-Premier di Hulanda Ruud Lubbers, ex-Premier di Antias Don Martina y e lider di pueblo Arubano Betico Croes.

Aruba a bira pais den Reino Hulandes

Despues di a concretisa e deseo di e pueblo Arubano pa su libertad na e RTC, Betico Croes a ser ricibi como un heroe na Aeropuerto Reina Beatrix riba dia 18 di maart 1983. Betico a logra loke otronan no tabata por y kendenan a tuma esaki pa un hazaña imposibel. Hecho ta cu e Status Aparte a ser logra despues di apenas 12 aña di lucha intensivo, esta di 1971 pa 1983! Y ta danki na e logro aki, Aruba a bira pais autonomo den Reino Hulandes y orguyoso di tin su propio Gobierno, Parlamento, Gobernador, Banco Central y moneda propio y propio instrumentonan economico pa por desaroya nos pais. Un pais digno y respetuoso den Reino Hulandes.

Pues laga e dia di awe ta un dia di reflexion pa balora e lucha inmenso cu nos Libertador Betico Croes a hiba 36 aña pasa durante e Conferencia di Mesa Rondo y cu a culmina den e realizacion di nos Status Aparte. E fecha di 12 maart 1983 lo keda marca pa semper den e historia politico y estatal di Aruba.

BON DIA YEN DI ALEGRIAAA !!

Skirbi pa Ruthy "Lady Ruth" Vrieswijk-Bergen

NOS no a perde e "touch cu nos muchanan" ! Despues di a retira como lider Bubbels den Scouting na aña 2010 nan ey, nos a acepta e invitacion di Richard Dabian di Biblioteca Nacional pa nos ofrece y comparti un actividad cu nos muchanan na BNA recientemente pa e dianan 5 y 6 di Maart, na BNA Playa dia 5 y dia 6 na BNA San Nicolas. Na BNA Playa tawata tin un grupo di mas o menos 25 pa 30 persona, muchanan cu algun mayor. Na BNA San Nicolas tawata tin mas o menos un dozijn. Pero, e ambiente tawata mes dushi !

Nos a prepara un bunita Power Point cu ayudo profesional di e gentil cabayero Marvin Odor di BNA cu mas o menos 20 potret di hendenan muher y homber cu a destaca aki na Aruba, poniendo asina accento riba dia 8 di Maart, dia internacional di hende muhe y dia 18 di Maart, nos dia Nacional di himno y bandera. Cu luz ariba varios cu ya no t'ey mas y ariba varios cu si t'ey cu nos ainda.

Nos a presenta esaki den forma di un storia, intercambia cu algun yells, poema y cantica.

No obstante algun di e muchanan, dos of ta tres mucha homber di 11 aña nan ey no por a sinta keto y comporta debidamente, nos a duna nos presentacion . Nos no a bay pa "educa" niun mucha y Richard Dabian di BNA mes tawata esun cu a purba di hala e muchanan atencion varios biaha. Danki Richard, abo conoce bo muchanan mihor cu Lady Ruth, bo ta wak nan tur siman.

Si mi tawata den mi grupo scout di antes, lo mi a actua y laga saca e dos tres muchanan ey te ora cu nan por a comporta debidamente sin stroba e resto di publico presente. Mi ta contento cu mi a uza e headphone cu microfon, sin hoef di a grita y of papia duro di mas. Nos ta spera cu na nan cas si nan ta mas disciplina y scucha nan mayornan y tambe comporta bon na scol. Semper tin dos of tres mucha hyper di mas cu sa haci fastioso aki of aya. Y principalmente drentando nan "teens", nan "puberteit" ta haci cu nan kier haci locual nan kier pa resalta como muchanan cu nan kier. Un danki special ta bay na sra. Vivian Lampe, e yiu muhe di nos tata di cultura Juan Chabaya "Padu" Lampe, kende a honra nos cu su bishita e atardi ey na BNA Oranjestad. Ta mas cu claro cu nos a papia un crenchi di Padu, kende ta bay cumpli 99 aña di edad dia 26 di April venidero, Dios mediante. Nos a papia un crenchi tambe di sra. Estevanita Erasmus "Mama Nini" awe den feliz memoria, kende a bin fei Cuba como un baby cu su mayornan y su bunita trabanonan pa Misa Sta. Filomena Paradera, y tambe como artista tocando su guitarra "trey".



Nos a papia di un role model pa nos muhenan sra. Yvonne Spellen , di su bunita trabao den Fundacion Hende muhe den dificultad. Tambe e.o. di un di mi bunita tianan, Irena Kelly-Tromp, encuanto su bunita cantamento di cancionnan country, y cu ta cerca mi tia Irena te na Canada Lady Ruth a siña "lecha un baca" na nan "Farm", na Three Hills, Calgary nan ey, na añanan setenta y cinco nan ey. Despues cu e la bira viuda na Canada, a bin biba bek na Aruba y a casa cu Kelly di Ayo. Lamentablemente mi bunita tia Irena tambe a fayece varios aña pasa. E muchanan por a wak potret tambe di Juffrouw Rita Williams, awe tambe den feliz memoria, un tremendo maestra na La Salle College, dunando e les di Ingles entre otro. Un maestra hopi stima pa su alumnonan. Nan a wak potret di John Fredy Montoya, un gran Poeta y artista, semper cla pa yuda unda cu e por riba tereno cultural. Y asina nos por sigui menciona e otronan, tur cu a destaca riba varios tereno social y of cultural. Nos dushi hendenan special cu nos no por lubida.

Danki na lieve Sofie di BNA cu ta traha tur e flyernan y poster pa nan actividadnan semanal pa muchanan di 4 te cu 12 aña y na Richard Dabian y demas coleganan manera Alex Koolman y Tico Boekhoudt cu semper ta cla pa yuda cu alma y cuerpo. Y cu un danki na lieve Catrarina y Mirla na BNA San Nicolas y na Marvin Odor cu a traha mi Power Point. Love you all !!

Antraco Business Solutions a haci donacion na Stichting Ambiente Feliz

ANTRAO Business Solutions como un di e lider nan riba e Mercado di printing ta sumamente contento di por a yuda haci un donacion di un copier na Stichting Ambiente Feliz.

Cu mas di 50 aña brindando e pueblo di Aruba producto y servicio nan di calidad ta kere den yuda nos comunidad y muy specialmente e stichting caricativo.

Riba potret por mira Directora Lukee Croes di Stichting Ambiente Feliz hunto cu Antraco su Technical Supervisor Sr. Benito Gomes cu sa di a guia e team di tecnico di Antraco cu excelencia pa asina a gana 3 aña consecutivo como e mihor departamento di servicio den Caribe y Latino America.



UPB a celebrá 'Dia Internacional di Hende Muher'



KRALENDIJK - Union Patriótico Boneriano tabata e único partido cu a celebrá 'Dia Internacional di Hende Muher' diabièrnè ultimo. E celebracion tabata na Cas Patriótico. Minister Suzy Römer tabata invitado special pa a tene un charla. Romeo Heye a actua despues. Fotonan ta duna un bista di e actividad aki.

PWFC, APRI, SEU, STO, STSK, BTG, STrAF, SITKOM, HIWA y SAP Solidaridad Sindical

WILLEMSTAD - “Sindicalismo no por cooperá pa hiba trahadornan plenchi sin mas.” Cu hopi atencion y ademas cu hopi preocupacion, sindicatonan cu ta forma Solidaridad Sindical ta siguiendo desaroyonan na Còrsou cu ta afectá e sector laboral en general y trahadornan di Còrsou en particular.

Pa basta tempu nos a bin ta advertí cu situacion ta birando pió y cu sindicatonan den Solidaridad Sindical no ta sinti cu tin un maneho cu tin cu sirbi pa yuda duna fruta na desaroyo di Còrsou.

Na mas cu un ocasion nos a bisa públicamente cu no ta aceptabel cu ta bolbe bin cu medida cu ta afectá e clase trahador comosifuera cu ta nan tin falta di tur cos cu ta bay malo aki na Còrsou.

Den cuadro di esaki nos a advertí públicamente y tambe serca Minister di Labor cu specialmente den tempo malo mester hiba un maneho incluyente y no excluyente. Nos a pone Minister di Labor na mas cu un ocasion na altura cu no tin participacion di sindicalismo di Còrsou na drechi y cu p’e motibo aki trahador ta wòrdo excluí den tumamento di decision y pa colmo decisionnan cu ta nan tin cu bay carga su consecuencia.

Dia 13 di decèmber último Solidaridad Sindical tabatin un reunion programá cu Minister di Labor cu e mes a cancelá y primintí cu e siguiente dia e lo pone un fecha nobo.

Te awe esaki no a sosodé. Despues a sali publicacionnan riba e documento “groeistrategie” cu nos a studia durante nos ciclo di formacion y duna nos opinion públicamente di rechazo bon cla riba e procedura y tambe su contenido.

Mientras cu ta yama e documento “integral en samen” nunca sindicalismo di Còrsou a haña e documento te

pa nan haña oportunidad di duna opinion riba esaki. Ta p’ese nos a keda sumamente sorprendi cu den Parlamento Gobièrno ta haci como sifuera cu ta abase di participacion amplio aki na Còrsou a yega n’e documento aki.

Nos ta floho di kere cu lo tin un sindicalista y/o un sindicato na Còrsou cu por a aprobá e documento aki caminda tin e barbaridad scirbí “rigide arbeidswetgeving, hoge loonkosten en lage arbeidsproductiviteit vormen grote belemmeringen.”

Cu esaki ta habri porta pa mishi cu trahador y kita proteccion laboral, for di e trahador cu ainda tin “privilegio” di tin trabou.

Nos ta floho di kere cu lo tin un sindicalista òf un sindicato, sea ta amigo di Gobièrno òf no, cu por a aceptá e barbaridad aki.

Pa colmo despues cu na hopi ocasion Gobièrno a nega redondamente cu lo bolbe bin cu medida, awor ta anunciá medidanan drástico den cuadro di e situacion financiero di Còrsou.

Te ainda Gobièrno ta propagá cu lo bin cu medida cu no ta mishi cu e clase trahador. Anto comunidad en general y clase trahador en particular mester guli e cuenta aki sin mas.

Den e cuadro aki sindicatonan di Solidaridad Sindical ta haci un yamada na tur sindicato di Còrsou pa forma un moketa pa defendé principio sindical na interes di trahador.

“Pa defendé e principio sindical aki no por tin niun diferencia di opinion. Sindicalismo no por cooperá pa hiba trahadornan di Còrsou plenchi sin mas!”

Registra awo!

Manda bo e-mail na noticia@awemainta.com

Ricibi AWEMainta tur dia den bo inbox



www.awemainta.com



www.facebook.com/awemainta



583-1400



583-1444

Nan no por sike usa e waf

Miss Ann Boattrips tin ku haña kita di Spaanse Water

WILLEMSTAD. Resientemente wes a duna veredikto den e kaso ku e bufete di abogado Huizing & Huizing a entamá na nomber di Spanish Water Resort N.V. kontra doño di Miss Ann Boattrips and Rentals N.V. ku ta eksplotá nan negoshi di tripanan turistiko pa Klein Kòrsou entre otro.

Na final dje kaso sivil ku a kuminsa for di dos aña pasá pa obligá e doño di Miss Ann Boattrips, sr. v.d. Vlies, pa muda su negoshi pa kualke otro parti, e desishon a kai na fabor di Spanish Water resort.

Wes a ordená e doño di Miss Ann Boattrips pa denter di seis luna bandoná e tereno i eventual konstrukshon riba e tereno di Spanish Water Resorts.

Si e mes no desokupá e tereno loke tin riba dje, doñonan dje tereno por desokupá i eliminá tur kos riba gastu di Miss Ann Boattrips.

I si ainda e kompania no muda, por ordená polis pa saka nan for di e sitio.

Wes a prohibi v.d. Vlies i klientenan di Miss Ann pa stashoná riba alsera i kayanan publiko di Jan Sofat so pena di un but di 500 florin pa kada violashon dje desishon aki te un maksimo di 50 mil florin.

Di awor te aki seis luna i despues Miss Ann no mag eksplotá mas ku un solo boto for di e pir so pena



di un suma di 50.000 florin te un maksimo di mei mion florin.

E tin seis luna di tempu pa regla ku no mag mara boto na su kas sino e tin ku paga un but di 5000 florin pa dia te un maksimo di 50.000 florin pa dia.

E desishon a drenta na vigor mesora. Basikamente e veredikto ta konfirmá ku e hecho ku v.d. Vliet a kumpra un tereno for di 1970 serka Spanish Water Resort i a kuminsa un negoshi di turismo ku ekskurshon ku boto i alkiler di boto chikitu, a pèmitié originalmente pa usa e tereno pa bai e pir i mara boto.

For di mei di 2016 Spanish Water a kuminsa e kaso ku a kulminá ku e veredikto na nan fabor.

Hasta wesnan a bai opservá e situashon pa tabatin un bista kompleto dje kaso.

E historia ta konosí kaminda den añanan 70 difuntu Arturo Jesurun ku su sosio drs. Vlietman a kumpra e tereno pa nan desaroyá pa traha kas di luho.

Hasta Musiu Lecavalerie tabatin un landhuis riba e tereno.

V.d. Vlies a kumpra e tereno bou di kondishon ku e por traha un week-endhuis of residensia riba e tereno.

Pa yega su kas e mester krusa algun desena di meter i ela haña pèmit pa hasi esei.

Sinembargo den kurso di aña e tereno a para bira negoshi kaminda ta mara boto i turistanan ta bin na bònchi ku tourbus lokual no tabata e intenshon.

Ku e veredikto aki a rektifiká un situashon ku a krese robes pero ku originalmente a konta ku bendishon dje persona ku a tuma e iniciativa pa verkavel Jan Sofat.

Pa kaso di supuesto violashon

Fiskal ta hiba Kurasoleño korte pa despues retirá tur kargo

WILLEMSTAD. Kurioso ta e fenómeno kaminda ultimo añanan más i más tribunalnan ta absolvé sospechoso of akusadonan integralmente for di kargonan ku Ministerio Publiko presentá.

Más kurioso ainda ta e hecho ku a paa ku un Kurasoleño na Rotterdam ku fiskalnan a akusá di violashon seksual pero den korte fiskal mes a pidi pa absolvé e homber.

Anto no ta ko'i loko Ministerio Publiko a lastra e homber dilanti wes.

Fiskal a akusé ku dia 11 di februari di 2017 bou di menasa ku kuchú a obligá un muhé pa tene relashon kune bisando e supuesto viktima "...si ami no, otro tampoko..."

Reportadamente ela tira e muhé riba sofá, ranka su kabai, skòp na su kabes i lastré hiba kama bisando "...asina'ki ta trata puta...." ni maske kuantu e viktima a protestá.

Di akuerdo ku verbal polisial dje kaso, e homber a choka



e muhé i mientras e tabata filma e escena ela bisa "...e muhé aki ke tene relashon ku tur mucha homber. Boso konosé? E ta biba na Rotterdam i ta bai kama gratis basta bo duné wiski pero ta mi amiga ku mi stima..."

Despues di a repasa henter e relato fiskal a pid pa absolvé e Kurasoleño sin duna mas splikashon i korte a bvai di akuerdo pasobra no por a proba nada di loke e muhé a denuncia.

E ta pretende di ta inosente

Mula (60) di Kòrsou kondená na 30 luna di prizon pa 8 kilo di kokaina

WILLEMSTAD. Fin di februari e tribunal penal na Amsterdam ku ta trata kasonan di apelashon, a konfirmá e veredikto ku korte den promé instansha a dikta kontra un mula ku a hiba 8 kilo di kokaina den su maleta for di Kòrsou pa Amsterdam.

E tribunal no a kai pa e argumento di web'i gai ku e no tabata sa ku tabatin kokaina den e maleta ku pa kolmo tabata asina un bagazán.

De fakto e tribunal di apelashon a konfirmá e veredikto di 30 luna pasobra no ta manera e akusado a plika ku no tabata su intenshon di ttransportá droga siendo ku e tabata sa debidamente ku ta droga tabatin den e maleta.

E wsnan a splika ku pa regla un pasahero ku ta biaha ku aavion i tin maleta mester sa ki tin den e maleta ei i ta responsabel pa esaki.

Den e kaso aki e mula a purba gaña wes ku ta un homber deskonosí na Kòrsou a dun'é e maleta.

Apesar ku e tabata na altura ku mulanan ta hiba droga Ulanda praktikamente tur dia den maleta of ku bolita, e no a puntra doño dje maleta nada.



Veredikto dje korte tabata ku e splikashon aki ta toalemente inaseptabel pasobra e maleta a pisa 20 kilo di kual 8 kilo tabata kokaina.

Si e no a ripará esaki, ta siegu mes e ta i por lo tantu su argumento no tin man ni pia.

Ta dia 6 di februari aña pasá a detené e muhé despues ku na yegada dje avionfor di Kòrsou, a tene kontròl èkstra.

Por lo demas e tribunal no a dediká masha argumento pa eyga ne desishon final ku e veredikto di 30 luna ta keda konfirmá.

Despues di kasi 5 aña

Retiro konfirmá pa bodyguard di Minister

WILLEMSTAD. E proseso a dura pero finalmente e instansha mas haltu den kasonan legal di amtenar a disidi ku e skòrsing i retiro ku gobiernu a duna e agente polisial dia 1 februari 2016 ta na su lugá i legal.

Por lo tantu no tin mas alternativa di apelasion mas posibel pe polis kende huntu ku un kolega di fam Th. na 2015 a bai aeropuerto i usando nan funshon komo kapa, a retirá merkansía for di ‘douanegebied’ kompletamente ilegal.

E tempu aya e kaso a lanta hopi komentario pasobra e tabata ún den e litania di hopi iregularidat ku e agentenan bodyguard di minister di aquel entonces tabata kometé sin haña sanshon.

Te ku aña pasá september ainda e kaso tabata lastra den Korte te ku finalmente e desishon final a kai resientemente.

E polis/bodyguard F.M. a haña retiro pasobra ela faya gravemente malusando su funshon di ‘VIP-beveiliging’ di Kuerpo Polisial den kombinashon ku otro kolega pa saka kontrabanda for di teritorio di duana sin a someté esaki na un chekeo.

Nan a engañá e seladornan na Hato gañando ku nan tabata presente den ehersisio di nan funshon i ku tabatin piesa di outo den e maletanan ku a bin for di Miami.

E polis a ninga tur kos i a haña ku e skòrsing i retiro ta in hustu i kastigu muchu pisá pa loke ela hasi.

E tribunal a splika ku pa un akto asina e polis mester

haña kastigu di retiro pasobra no solamente mester tin prueba kontudente di su fayó ku a sali na kla durante e investigashon penal.

Definitivamente e polis a hasi su mes kulpabel na akto kastigabel malusando su posishon di bodyguard di minister.

Pa kolmo nan a hasi ganashi tambe ku e hecho aki.

Nan no tabatin nada di hasi na aeropuerto den nan ora liber i menos ainda usa nan funshon pa saka kontrabanda for di aeropuerto.

E uniko defensa ku e polis tabatin den e kaso di apelasion ta ku nan no a duné chèns pa skucha e hendenan ku a testigua kontra dje.

Simplemente no tabatin motibu pa yama mas testigu pasobra e pruebanan tabata riba mesa.

I pa kolmo e cherry riba e bolo di prueba kontra e polis ta ku ela tranzja ku fiskal pa paga 4900 florin pa no hibé dilanti wes penal pe kontrabanda ku ela kometé.

POPLIS MESTER TA KKKONFIABEL

E tribunal a opservá ku polis mester kumpli ku eksigenshanan estrikto pa loke ta nan konfiabilidad i honestidat ku ta forma integridat, speshal ora nan tin un tarea speshal manera bodyguard di VIP.

Komportashon inkonfiabel den un posishon asina responsabel ta inkompatibel ku e funshon i ta solamente retiro inkondishonal ta un kastigu korekto.

Embahadora di Canada:

Canada ke desaroyá mas aktividat komersial ku Kòrsou

WILLEMSTAD. - Minister interino di Desaroyo Ekonómiko Sr. Kenneth Gijsbertha a risibi bishita di Embahadora di Canada pa Reino Hulandes na Den Haag, Señora Sabine Nölke i su komitiva.

Huntu ku e embahador a bini un funshonario di Relashonan Eksterior for di Ottawa i tambe e agregado Ekonomiko kanades ku sede na Caracas Sr. Victor Stott.

E bishita tabata den kuadro di e strategia di Canada pa forma aliansanan nobo ku paisnan den nos Hemisferio i diversifiká e merkadonan pa kompanianan di Canada

pa asina nan ta menos dependiente di Merka.

Minister Gijsbertha i Sra. Nölke a interkambiá ampliamente riba temanan manera turismo, konektividat, invershonan den sektornan di prioridat na Kòrsou manera energía duradero, teknologia i servisio finansiero.

Canada ta masha interesá pa risibí mas estudiante for di Kòrsou pa sigi nan estudio einan. Pa esaki nan ke traha estrechamente ku Gobièrnu di Kòrsou.

E embahadora a ilustrá ku Gobièrnu kanades a negligishá paisnan den Karibe, pero ku esaki a kambia i ku nan ta spera di por stimulá mas kompania kanades pa invertí na Kòrsou.

Lo forma un grupo di trabou entre e funshonarionan di Kòrsou i Canada ku lo bai organisa un plan di akshon pa atraé mas aktividat ekonómiko for di Canada.

Royal Aurora

Funeral Home & Crematory

We the Family, Relatives and Friends of the late
Ronald Julius Olivier Manuela (Better known as Ronny, Baba
Charlie)



To thanks those that showed their support throughout his
illness in some way or other.

We will be forever GRATEFUL to these individuals
Specialist Dr. Schwengle, Specialist Dr. S Kock and staff, nurses,
interns at the Dr. Horacio Oduber Hospital Department "niet
snijden 2" AZV and most of all David Jans his Physical
therapist for given him all the support and the JOY of working
on the "Spitfire".

THANK YOU "they like us"

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".
Salmo: 23

A fayece:



Virginia Bernardina Hernandez-Concencion

*20-05-1919 - †06-03-2019

Na number di su:

Casa: Marciano Hernandez
Yiunan: Luis G. y esposa Luz S. Hernandez
Marciano G. Hernandez y pareha Swinda R. Dijkhoff
Nietanan: Samir, Mario, Joshua, Cristian Bryan, Robinson
Nietanan: Zhamira, Marcienny
Bisanieta: Elise, Sara, Shaily, Amiyah
Famia na Curacao, Hulanda, Merca, Venezuela, Colombia y St. Lucia
Amigo cerca di famia: Jimmy y Sandra Koolman

Acto di despedida ta tuma lugar diaranson 13 di maart 2019 di
2'or pa 4'or di atardi na Aurora Funeral Home, sigi pa acto di
cremación.

Royal Aurora

Funeral Home & Crematory

Cu hopi tristesa na nos curason
pero agradecido pa loke e la nifica pa nos,
nos ta anuncia fayecimento di



Tjin Fong Tjin

Mihor conoci como: Johnson
Na bida propietario di Johnsons Supermarket

Dia y ora di condolencia y entierio lo wordo anuncia despues.

Royal Aurora

Funeral Home & Crematory

Cu hopi tristesa den nos curason pero agradecido pa loke e la
nifica pa nos, nos ta anuncia fayecimento di:



Evelyn Rainelda Kelly De-Freitas

Miho conoci como: "Raiza"
*25-08-1963 - †10-03-2019

Dia y ora di condolencia y despedida lo wordo anuncia
despues.

Royal Aurora

Funeral Home & Crematory

Met heel veel verdriet maken wij het overlijden bekend van
onze geliefde, dierbare en onvergetelijke echtgenoot,
stiefvader en broer.

Rob Drost

Helga Drost-Schönig
Hans-jürgen, Olaf en Birgit Dose
Annemarie Broersen
Ruud Drost en Anita Anita Lammers
Rob en Karin Drost
Annemarie en John Groenewoud

Gelieve geen rouwbeklag aan huis.

De uitvaartdienst vindt plaats op Zaterdag 16 maart 2019 van
14.00-16.00 uur in de Aula van Royal Aurora
Cumana# 76, Oranjestad- Aruba.

Royal Aurora

Funeral Home & Crematory

Gradicimento / Invitacion

Den number di casa, yiunan, nieto(a)nan, bisanieto(a)nan nos
kier a gradici tur esnan cu un of otro manera a muestra nan
atencion y duna nos consuelo y sosten durante fayecimento y
entierio di nos casa, tata, welo, bisawelo stima :



Epifanio "Pief" Geerman

Un danki special na famia completo, cunñanan, sobrino(a)nan,
primo(a)nan, amigonan y conocirnan.
Danki na Margareto Ramirez pa e ayudo incondicional. Danki
na e personal di Wit Gele Kruis cu ta bin banje tur dia, danki na
personal di ambulance ki ora jama nan ta presenta den un
frega di wowo.

Danki na e personal di ICU na Hospitaal.

Danki na Igmar Maduro pa e bunita canticanan durante
entierio, danki na Mariachi Liros del campo pa e bunita
canticanan den misa y Santana. Danki na tur esnan cu a manda
e-mail, mensahe, whatsapp di condolencia.
Danki na esnan cu a manda flor, krans y donacion den e box na
misa.

Un danki na Aurora Funeral Home pa nan excelente servicio..

Danki di curason pa boso sosten pa nos famia.

Alavez nos kier a invita bo(so) tur pa compaña ns pa 2 Santo
sacrificio di misa cual lo tuma lugar na Misa Inmaculada
Concepcion na Sta Cruz.

Diamars 12 maart 2019 pa 7'or di anochi

Diabierna 15 di maart 2019 pa 7'or di anochi

Despues di ultimo misa lo tin un Rosario na cas Warawara 12
Boso presencia lo ta altamente aprecia

Rest In Peace

Royal Aurora

Funeral Home & Crematory

Semper bo kier pa bo Mama t'eynan
Maske cuanto su edad avansa
Bo ta pidi: Lag'e sigui biba Señor,
Pasobra bo ta stime
Ma ora edad trece fatiga y dolor y su
Curpa ta keda cansa.

Bo ta roga na Dios: "porfavor bin tume, pasobra bo ta stime"

Cu inmenso tristeza Sabine, Michael y Eugene ta participa cu a
fayece Cristianamente nan mama:



Sra. Vda. Gicela Wilda Montesant-Odor

Mihor conoci como "Wilda"
*31-08-1933 - †10-03-2019

Acto di entierio lo wordo anuncia despues

Royal Aurora

Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras ta bunita y
Laga esakinan termina den buniteza

Cu inmenso tristeza den nos curason pero agradecido pa tur loke nos a comparti cune, nos ta anuncia fayecimento cristianamente di:



GILBERT ARTHUR TROMP

mihor conoci como "Hubert" of "Jey Jey"

* 5-3-1957 - †10-3-2019

Acto di entiero lo wordo anuncia despues


Royal Aurora

Funeral Home & Crematory

Entonces Jesus dijo:
Yo soy la resurrección y la vida.
El que cree en mi vivirá, aunque muera;
y todo el que vive y cree en mi no morirá jamás.
Juan 11: 25-26

Con inmenso dolor en el corazón, pero agradecido por cada momento y por todo lo que hemos compartido al lado de nuestra. Madre, abuela y amiga querida. Y conforme con la voluntad de DIOS.

Anunciamos el fallecimiento de



Sra. Miriam Eloina Chavez Hernandez

* 8-02-1938 †10-03-2019

En nombre de su:

Esposo: †Rolando Santana Castellano

Hijos: Argelio Fermin Rivero Chavez

Vivian Santana Chavez y Jose Enrique Fernandez Aragon

Nietos: Antwan Stephan Pourier
Roxana Rocio Rivero Ramos
Arianne Cecilia Rivero Irizarri

Invitamos a nuestros hermanos, primos, sobrinos y familia general de Cuba y Aruba. para asistir al velorio que se llevará a cabo el día 13 de Marzo de 2019 desde las 2 a las 4:00 p m y de ahí al acto de entierro en el cementerio central en Sabana Basora

Nuestras disculpas pero no recibiremos visitas de condolencias en la casa.

Royal Aurora

Funeral Home & Crematory

"SEÑOR ta mi Wardador,
Mi n' tin falta di nada.
Den kunuku di yerba berde,
E ta pone mi sosega.
E ta hiba mi na awa trankil,
Pa mi bolbe haña forsa."

Conforme cu boluntad di Dios, nos ta anuncia fayecimento di nos tata, welo, bisawelo, ruman, omo, primo y comper:



Sr. Juan Thiel

Mihor conoci como "Papa Juan"

* 18-09-1935 - †09-03-2019

Ex empleado di WEB

Acto di entiero lo wordo anuncia despues

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".

Salmo: 23

Cu dolor na nos curason pero conforme cu boluntad di Señor, nos ta kier anuncia fayecimento di nos difunto stima:



Elma Gonzalez

*12-10-1954 - †05-03-2019

Na number di su:

Yiunan: Monica Gonzalez y esposo William
Janeth Millan
Vivian Millan

Nieto(a)nan: Jorge Manuel, Sofia, Sebastian, Thaliana
Ruman: Marina Trina, Sadia, Lucy, Paola, Paolo Jorge,
Marcos, Juancarlos, †Jairo Arlemir

Bon amigonan: Alex Croes y Angela Maria Croes
Swa y cuñanan: Carolina, Sandra, Jhonathan, Garcia
Primo(a)nan, amigo y conocirnan, bisñanan, famia de Veer.
Demas famia na Aruba y Colombia.

Ta invita pa cto di condolencia y despedida cual o tuma lugar na Aurora Funeral Home diamars 12 di maart 2019 di 2'or pa 4'or di atardi. Cremacion lo tuma lugar den ceno familiar. Disculpa nos si den nos tristesa nos por a lubida algun famia of conoer.

Detencion en coneccion cu violacion ley di arma di candela

WILLEMSTAD - Dialuna 11 di mart 2019 alrededor di 04.45'or di madrugá, Central di Polis a ricibí informacion cu tin un hòmer cu un arma di candela na altura di un establecimiento den área di Suffisant.

Un unidad policial cu a yega n'e sitio a topa cu e hòmer. Durante di un contròl riba e sospechoso Polis a haña y a confiscá un arma di candela y un cashi di bala.

N'e sitio a detené e sospechoso N.C.D.L. nace na Còrsou di 42 aña di edad, pa violacion di ley di arma di candela.

A presentá e sospechoso dilanti di un Fiscal auxiliar kende a ordená su encarcelamento pendiente di mas investigacion.

Royal Aurora

Funeral Home & Crematory

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa".

Salmo: 23

A fayece:



Roland Crispino Eckmeyer

*25-10-1960 - †09-03-2019

Acto di entiero lo wordo anuncia despues!



AWEMainta

E unico corant GRATIS



Abona awo

Manda un e-mail na:

Noticia@awemainta.com

y skirbi e palabranan: *"Ami Kier Abona"*

Like nos riba facebook

Keda "up to date" y like nos riba facebook
www.facebook.com/awemainta



Subi riba nos website

www.awemainta.com

AWEMainta completamente

DIGITAL